

TE HEHEURAA API

I neia i te piha neneiraa a te Ekalesia a Iesu Mesia i te Feia Mo'a i te Mau Mahana Hopea Nei, i Papeete, Tahiti, i te mau fenua Sotaiete, i te mau avae atoa. Te hoo, e piti farane i te matahiti hoê.

"O te faautua mai i te taata atoa, ia au i ta'na ra mau ohipa.

"I te feia i imi i te hinuhinu, e te tura, e te pohe ore, i te tamau maiteraa i te parau maitai, o te ora mure ore ia." Roma 2: 6, 7.

Nu. 5.

10 Febuare, 1911.

Mat. 4.

Parau No Te Ora.

E POHE anei te varua o te taata nei? Aita, e ere te pohe varua i parauhia i roto i te parau a te Atua i te mouraa o te varua taata. Aita roa ia te varua taata e mou, e tia râ te reira i te oraraa e a muri noa'tu. No te mea hoi e tamarii te varua taata nei na te Atua pohe ore, e e Atua mou ore Oia. E e mea mou ore te taata. Te tino taata ana'e tei pohe, area e faahuru-ê-hia ia te reira i roto i te tia-faahouraa ia riro teie nei tino taata ei tino varua, e teie nei tino pohe noa ei tino pohe ore e tia'i. Kor. Hoê 15: 44-53. E e ora atu â e a muri noa'tu. No te mätä'u rahi o te feia hara, e te mamae rahi hoi e imi â ratou i te pohe, eita râ e itea. E hinaaro râ ratou i te pohe, eita ia e noaa, hinaaro ra i te mou, eita râ e mou. Mai te aha te maoro o ta ratou faaoromairaa e tia'i? Teie ia, e tae noa'tu hoi i te pee-roa-raa'tu i te utua iti hopea roa no ta ratou mau hara e ua fariu mai i te Atua, e ua haapao ratou i te mau ture a te Atua. Mat. 5: 26. Apo. 6: 15-17. Ua tia ia parau tatou e, o te

ora e manaraa ia i nia i te mau enemi. Ia roaa te taata te mana i nia i te mau mea atoa nei a pohe ai oia, ua tia ia parauhia tei ia'na te ora mure ore. Ia hinaaro te taata i te reira mana e noaa ia ia'na na roto i te haapaoraa i te mau ture a te Atua, e aita'tu ia ravea. Mat. 19: 17. E mea horoa-noa-hia mai ia te ora e te Atua, e aita râ e noaa i te taata haapao ore. Ia haapaohia te tahi ture e te taata, e mana to'na i nia i te mea i faaauhia'i tana ture ra; e ia haapaohia i e piti e e toru noa'tu e a'na, ua tupu to'na ra, mana i te rahiraa, e ia haapaohia te mau ture ia'na, e mana to'na i nia i te mau ture atoa. E ua noaa ia'na te reira na roto i te haapao, e ua upootia oia, ua ora. Rom. 2: 6-9. Eaha te mau enemi no te ora? Teie ia, maori râ te mau mea atoa nei tei haaparuparu i te mana'o taata, tei faaore i to'na faaroo e tei faaho'i ia'na i muri, te mau mea o tei faatupu i te pohe, o te mau enemi mau ia no te ora.

Te mau mea atoa nei o tei faaino i te tino, mai te ava-ava, te taofe e te tî, te ava taero, te uaina faahopue, te taiata e te oehamu tiaa ra. E taua mau mea nei o tei haaparuparu ra i te taata i te imiraa i to te ora, no reira e mau enemi ana'e ia no te ora. E te feia tei rave i te reira mau peu, e ore ratou e parahi i te basileia o te Atua. Gal. 5: 19-21. E mau hopoia teimaha e te faataupupu ana'e ia i nia i te taata. Te mau peu faufaa ore, te mau mana'o iino e te mau parau haavare, e te mana'o ori haere noa aita i faatanohia'i i nia i te feruriraa tia, e mau enemi ana'e ia no te ora, e mau aihere faufaa ore ana'e ia i ore ai i tia'i te ora ia tupu i roto i te aau. Tirara'tu ravea e tupu ai te ora, oia hoi ia vaere te aihere ia ore te apiapi o te aau, a faatupu ai i te huero no te ora, oia hoi te mau parau, e te mau faa-ueraa na te Atua. Duet. 30: 19.

E mana anei to te hara tumu i nia i te taata? Aita, aore roa tatou i tauturu atu i te rave raa i te hara tumu, no reira e ore roa tatou e faautuahia no te reira, ua faaora roa

râ te Atua ia tatou i te reira i ta'na ra Tamaiti ia Iesu Mesia. Na roto i te pohe o Iesu Mesia ua ore roa ia te mana o te hara tumu i nia i te taata atoa nei. Mai te taata i hope i te pohe ia Adamu, e hope atoa i te faaorahia i te Mesia. Kor. Hoê 15: 22. Ioa. 1: 29. Eaha te ravea e ora'ite taata i ta'na iho mau hara?. No te mea e haavahia ia oia i te reira, eiaha i te hara ta Adamu i rave na. Mat. 16: 27. Na roto i te ohipa e te pohe o Iesu Mesia ua roaa ia tatou te ravea e ora'i tatou i ta tatou iho mau hara. Teie hoi taua ravea ra, maori râ te evanelia a Iesu Mesia. Rom. 1: 16. O tei faaroo i te Atua, e ua tatarahapa i ta'na mau hara, e ua bapetizohia i raro i te pape ia matara ta'na mau hara, e faaorehia ia ta'na mau hara e te Atua; e ia tuuhia te rima o te tavini o te Atua, e horoahia mai ia te Varua Maitai o tei tauturu ia'na i te imiraa i te mau mea tia, e te mau mea hohonu atoa a te Atua ra; e ia tauturuhia oia i te reira, e i te haapao-maite-raa i te mau ture e te mau faaueraa a te Atua e tae noa'tu i te hopea o ta'na oraraa. E tei na reira i te rave, ma te haapao tamau maite e tae noa'tu i te hopea ra e roaa ia te ora mure ore ia'na. Mat. 7: 21. Aita roa i tia i te taata ia faaora ia'na iho i te pohe, e aita atoa e faufaa to'na haapao maitai maori râ ua aroha mai te Atua ia'na e faaora ia'na i te pohe. No reira e afa parau mau ra e, no te aroha a te Atua e ora'i te taata, e e afa, parau mau hoi te parau ra e, no te haapao maitai o te taata e ora'i oia. Area teie ia te parau mau roa, oia hoi no te aroha o te Atua e te haapao maitai o te taata e ora'i oia. No te haapao ore o te taata te tumu mau ra i taa ê ai oia i te aroha o te Atua. Isa. 59: 2. Na roto i te apitiraahia te aroha o te Atua e te haapao maitai o te taata e ora'i oia. Mat. 7: 21. Eph. 2: 4, 5. Te haavare nei te taata e rave rahi ia ratou iho i te mana'oraa e, ua ora roa ratou, no te mea ua faaroo ratou ia Iesu Mesia, area râ e mea nainai râ ta ratou ohipa maitai i rave. E parau mau no te faaroo e ora'i te taata, no te mea

Aita,

nu, no
ra roa

aita i tia ia faataa te faaroo mau e te ohipa haapao maitai. Ahiri aita e faaroo, haavare ia, e ere ia i te faaroo mau, e mea pohe râ. E haavahia te taata atoa e au i ta ratou ohipa i rave, tei iti ta ratou mau ohipa maitatai i rave, ua mairi ia i muri. Ia apitihia te faaroo e te ohipa e tia'i. Iak. 2: 20. Tera ia te huru ohipa e ora'i te taata nei, oia hoi te huru ohipa e ravehia e Iesu Mesia to tatou aveia, ia pee tatou i to'na taahira avae e tia'i. Ua haamaitai atu, ua haapii atu ua faaitoito atu, e ua faaora'tu Oia i te taata atoa, ua imi Oia i te maitai no te taatoaraa ma te faaea ore, ia na reira atoa tatou e tia'i. Ioa. 14: 6.

E au mau hoa e, e imi tatou i te ora, no te mea o te tao'a ia te reira i hau a'e i te mau mea i itehia e te taata. Te hinaaro nei te Atua ia ora ta'na mau tamarii atoa, eiaha ia moe te hoê, no reira ua tonono mai Oia i ta'na Tamaiti fanau tahi ia ora to te ao ia'na. E teie nei a taio mai na i te parau o Iesu i te na ôraa e "Eahata te taata faufaa i noaa, ia noaa ia'na te tao'a atoa o teie nei ao, ia ere oia i te ora? Eaha hoi ta te taata e ore e horoa ei hoo i to'na iho ora?" Te feia haapao e te parau-tia ra o tei rave ia i te ora mure ore, e e tae ratou i te vahi i haapaohia e te Atua no ratou, e e noaa ia ratou te mau mea e hau a'e. "O tei ore i hiohia e mata ra, aore i faaroohia e te tari'a ra, aore hoi i ô i roto i te aau o te taata ra, o ta te Atua ia i vaiiho no te feia i hinaaro ia'na ra."—VILIAMU SETEMILA.

"E te parau ta'u i papai ma te paruparu ra, e faaetaetahia ia na ratou; no te mea e haapii atu te reira ia ratou ia rave i te maitai ra; e faaite hoi ia ratou i te parau o to ratou mau metua; e parau hoi ia no Iesu ra, e e haapii hoi ia ratou ia faaroo ia'na, e ia faaoromai e tae noa'tu i te hopea, oia te ora mure ore ra." Buka a Moromona, II Nephi 33: 4.

"Eiaha e titau i te taoa, i te paari râ; e inaha e heheuhia mai ia te mau mea hohonu a te Atua ra ia oe nei, ei reira oe e faufaahia ai; oia ia, o tei noaa ia'na te ora mure ore ra ua faufaahia ia." Buka Fafau Sanito 6: 3.

Te Parau Tuatapapa no
Iosepha Semita.

(TUATIRAA.)

PENE V.

MATAHITI 1824-1827.

Te tia i ra Iosepha i na matahiti e maha. Te rave ra oia i te ohipa i Penesalavenia (Pennsylvania). Ua faaipoipohia Iosepha. To'na haereraa hopea i te aivi ra o Kumora. Ua auauhia oia e te mau eiâ haru, hemo i hora ratou ia'na.

NA matahiti e piti i muri a'e i te orama rahi i iteahia e Iosepa, ua rave noa oia i te tahi noa'tu huru ohipa i iteahia e a'na; te tahi mau mahana ua rave i te ohipa na nia iho i te fenua faaapuraa no ta'na i hora metua tane, area i te tahi â mau mahana ua tarahuhia oia ei rave ohipa na vetahi ê ra mau taata. Ua rave itoito ta'na metua tane e na taeae atoa na'na i te ohipa, no reira ua noaa te mau mea i hinaarohia e ratou. I te avae ra o Novema i te matahiti 1824, ua pohe roa to'na tuaana matahiapo o Alavina (Alvin) e ua oto rahi Iosepha no te mea ua faaitoito noa Alavina ia'na i ta'na ra hamani-ino-raa-hia, e te oaoa noa ra oia i te ohipa e vainei i ravehia e Iosepha e tia'i. Ahiri aita oia i pohe na ua tauturu-noa-hia Iosepha e a'na, mai ia Iosepha ua tauturuhia mai ia e Haeramu; teie râ ua pohe roa oia, area ua hamani maitai oia ia Iosepha e tae noa'tu i to'na poheraa. I te avae ra o Atopa i te matahiti 1825, ua tarahuhia Iosepha e te hoê taata o Josiah Stool te io'a, o tei parahi ra i te mataeinaa o Tenanago (Chenango) i te tufaa fenua rahi ra o Niu Ioka (New York).

E ua faaroo taua taata ra ua heru ê na te mau taata Paniola i taua fenua ra e ua iteahia te moni ario e ratou. E hou to Iosepha tarahu-raa-hia ua heru oia i te fenua peneiaie

e iteahia taua vairaa moni na'na. E i muri a'e ua faaue oia ia Iosepha e te tahi atu â mau taata rave ohipa no'na ia heru ratou i te fenua e imi i taua vairaa moni ario, e ua rave ratou i taua ohipa ra, e mea huru maoro, fatata hoê avae, aita roa i manuïa taua ohipa ra ei reira ua parau atu Iosepha i taua taata a faaea i te heru i te fenua. Faaea ihora ra. Te reira te tumu i parauhia'i Iosepha e, e taata heru moni. Te rave noa ra Iosepha i te ohipa ia Josiah Stoal, te tia noa ra oia i ô te hoê taata ra o Isaac Haley te io'a. E i to'na parahiraa i reira, ua farerei oia i te tamahine na taua taata ra o Ema te io'a, e ua tupu to'na here ia'na e ua here atoa oia ia Iosepha. E tamahine maitai roa oia, e ua momo'a-hia raua. Te vai ra te mau tamahine e rave rahi e ore e tia ia ratou ia faaipoipo i te taata haehaa e te tao'a ore; aore Ema mai te reira mau tamahine i te huru. E taata veve Iosepha aita to'na e fare. E ua hamani-ino-atoa-hia ia oia. E aita te mau fetii no Ema e faatia ia faaipoipo oia ia Iosepha, no te mea e taata enemihia oia, area râ ua ite Ema e taata maitai, e ua papu roa to'na mana'o e e taata maiti-mau-hia oia e te Atua, no reira ua tia ia'na ia faarue i te utua fare, e te mau fetii atoa, e ia ati atu ia'na. Ua faai-poipohia raua i te 18 no Tenuare i te matahiti 1827, mea fatata hoê avae i muri a'e i te 21 no to Iosepha matahiti.

E teie nei ua paari Iosepha, e ua fatata te taima e rave ai oia i te mau api auro, mai te faauehia mai e Moroni, ua haere oia a tahi haereraa i te aivi ra o Kumora i te matahiti hoê i na matahiti e maha i mairi a'e nei e ua ite ê na oia ite mau mea i roto i te afata ofai ra. Ua haapiihia oia e te melahi i te mau mea e rave rahi i ta raua na farereraa e ua faaitoito te melahi ia'na ia rave i te mau mea tia. I te mahana 22 no Setepa, matahiti 1827 ua hope na matahiti e maha i haapaohia ra e i taua mahana iho â ua tae Iosepha i te aivi ra o Kumora; e ua iriti oia i te afata. E inaha tia a'era Moroni i pihaiho ia'na, e ua horoa ia'na i te mau apî

auro te Urima e te Tumima, e te paruru ouma auro. E ua poroi mai te melahi ia'na e tia maite oia i taua mau mea ra e tae noa'tu i te horoa i to'na iho ora e tia'i, mai te mea e moe taua mau mea nei ia'na na roto i te haapao ore e faahapahia ia oia e te Atua. Ua faaitēhia oia e Moroni e tamata te mau taata hara ia noaa te mau api auro; area râ ia haapo maitai i te tapea ia ratou e tauturuhia oia e te Atua.

Mea fatata te mau api auro i te 8 initi i te roa e e hau a'e ratou i te rairai i te punu rairai roa nei. No te rahi o te mau api auro riro atura ratou ei buka mea fatata e 6 ia initi i te meumeu. Ua haamauhia te mau api i na tapea auro e toru i te tahi hiti, e ua haamau-atoa-hia ia te tahi atu hiti, oia hoi, te toru o te tufaa te reira no te mau api i na tapea auro e toru, e ua piahia te reira vaehaa. Ua ootihia te mau api auro i na pae e piti i te papairaa nehenene huru ê, aore Iosepha i ite-ê-na i te reira huru papairaa.

Te mau api e te paruru ouma na mea anoi-ore-hia ei auro ana'e. Ua au te paruru ouma i te taata tino rahi. Ua haamauhia te Urima e te Tumima na nia i te paruru ouma area ua tia ia iriti noa te reira. Mai teie te huru o te Urima e te Tumima, ua au ia i te tahi titea mata, e ua haamauhia i na ofai ateate i roto ei mono i te hi'o i roto i te mau titea mata nei.

Ua hiopoa Iosepha i taua mau mea nehenene roa ra, e ua tupu te oaoa rahi i roto to'na aau, no te mea ua horoa te Fatu taua mau mea nei ia'na; area râ ua riro te reira mau mea ei hopoia teiaha i nia ia'na. Ua haapiihia oia i te mau mea e rave rahi i na matahiti e maha i mairi a'enei, e ua papu to'na mana'o e riro te mau api auro ei tumu no te hamani ino ia'na. Ua tuu oia te mau faufaa ua noaa ia'na i raro a'e i ta'na pereue e ua haapapu to'na mana'o e e tiaimaite-hia te reira mau mea e a'na e tia'i, haere atura i te utua fare. I to'na haereraa ua tamata te tahi mau taata hara, ia haru te reira mau mea ia'na, ua tairi ratou ia'na i

te raau area e taata rahi e te puai, e i auauhia oia e ratou, hemo a'era ratou ia'na ora'tura. Ua auau noa ratou ia'na ia fatata a'era i te utua fare no ta'na metua tane, aita i roohia, area ua huru paruparu e te paupau hoi te aho, no te mea e hopoia teiaha ta'na i afai, i te hororaa.

—VILIAMU SETEMILA.

(E tuatihia mai teie parau.)

Na E'a e Piti.

E UIRAA eaha te huru o taua na e'a ra? Pahonoraa Atahi o te e'a e tae atu i te ora. Te piti ra te e'a e tae atu ai i te pohe, mai ta Iesu parau maira e. "E tomo na te uputa pirihaio; te atea nei hoi te uputa e te aano nei te e'a e tae atu ai i te pohe, e e rave rahi tei na reira i te tomo. Te apiapi râ o te uputa e te piri hoi o te e'a e tae atu ai i te ora, e te iti hoi o te feia i te atu i te reira."

Ua horoa maira te Atua i te tiamâ i te taata nei, e tia ia ratou ia haapao noa i ta ratou e hinaaro ra, ia haere noa na teie e'a e ia haere noa na tera'tu e'a; ia haapao e ia ore e haapao; ia mau i te parau mau e ia ore ia mau; ia haapii e ia ore ia haapii, e ia ore ia rave i te ohipa, e ia rave i te ohipa. Ua horoahia mai e te Atua i te taata ia riro oia ei fatu no'na iho. Ua faaterehia râ teie nei ao e te mau mea atoa i roto ra i te ture; to te ra'i, e to te fenua, e to te miti hoi. Te ohipa ra e te ohipa ore ra hoi te mau mea atoa nei e au i te mau ture i haamauhia e te Atua. Ua faaauhia e ua haamauhia hoi te mau mea atoa nei i te ture. E utua hoi tei faaauhia na te mau ture atoa ra. E utua haamau-ruuru tei faaauhia na to te haapao i te mau ture; e utua haamauiui hoi tei faaauhia na to te te ore e haapao i te mau ture. Mai te faaitetia mai i te Ioane 5: 29; Mataio 25: 46; Roma 2: 7, 8. Teie hoi te tumu i faaauhia te utua o te maitai, e te utua o te ino, i te mau ture i haamauhia e te

Atua, oia hoi ia tupu to te taata haapao maitai nei mauruuru e te oaoa i te roaaraa mai te utua faahiahia no to'na ra haapao maitai, e ia tupu hoi to te haapao ore nei tatarahapa i to'na roohiaraa mai i te utua o te ino no to'na ra haapao ore, viivii ai to'na ra tino e i mamae ai hoi to'na ra aau. O te haapao maitai e au i te mau ture a te Atua, e tupu ia i te maitai rahi, e o te ore e na reira i te haapao, e ore ia e tupu i te maitai rahi. E piti utua to te mau ture atoa nei; e utua ora no to tei haapao, e e utua pohe no to tei ore i haapao.

E piti noa iho e'a tei mua i te taata nei, oia hoi, te e'a haapao e te e'a haapao ore. To tei haere noa na te e'a haapao e ora to ratou. To te haere noa râ na te e'a haapao ore, e pohe to ratou, e tupu ia i te ino rahi; e roaa hoi ia te mau uiui aau; aita'tu ta ratou e ravea maori râ i te faaoromai i to ratou mau pohe e tae noa'tu e fariu mai ai ratou ra a haere noa'i na te e'a haapao maitai. A haamana'o hoi i teie. Hoê noa iho e'a ora. Eiaha e piti, eiaha hoi e toru, hoê noa iho râ. Aita te Atua i haafifi i te mana'o o te taata i te tuuraa mai ite piti e te toru. Hoê noa iho e'a ora ta te Fatu i haapii mai i te taata nei. O te tapea i te aau taata ia ore oia ia hi'opoa i te mau parau atoa e o te haafifi e te haapouri hoi, na te paeau Varua ino ia. E no reira ia haapae mau tatou i te piti o te e'a i faaitehia i nia nei no te mea ua iteahia taua e'a ra o te aratai ia, ia tatou i te pohe.

E teie nei e hoa ino e, eaha ia teie nei e'a ora e teie nei haapaoraa i parauhia iho nei? Teie ia o te Evanelia a Iesu Mesia. E riro paha te tahi i te pahono mai e, eaha ra, e rave rahi te huru evanelia o tei parauhia i te Evanelia a Iesu Mesia i haapiihia i roto i teie nei ao; e mea ê ta te tahi haapaoraa i haapii i ta te tahi. Eaha ra te parau mau e itea'i?

E toru ravea te vai nei e itea'i te parau i te mau mea atoa nei, oia hoi, 1, E imi hua i te parau mau ma te faaea ore: 2, E hi'opoa maite i te mau parau atoa e tuuhia mai ia ore ia vare; 3, E farii e e haapao hoi i tei maitai. O

tei parau e, eiaha e imi, eiaha hoi hiopoa na te varua ino ia. Hoê ia to ratou huru e ta te Pharisea o tei tapea noa i te aau taata eiaha ia feruri ratou i te parau a Iesu. Eiaha hoi teie nei na ravea e toru nei e rave-noa-hia mai te mana'o teoteo, te tâhitohito e te faaahaaha ra. Mai te aau haehaa râ e te pure e te hinaaro papu ia riro ei pîpî mau na Iesu. Mai te mea e na reirahia ra, e itea-papu-hia'i te Evanelia mau a Iesu Mesia e ora ia. Ioane 7: 16, 17.—Na Rua.

Te Mau Parau Api.

TEI Takaroa to matou amuiraa i te Eperera i mua nei. Na te mau amaa ekalesia e haapao i te reira e tia'i.

Tei te fenua ra o Alaka i Amerika Apatoerau te tahi mou'a auahi o "Shishalden" te io'a. E 8,000 avae te teitei o taua mou'a ra, e te ama faa-hou ra i teie nei. Ua ama mutaa ihora i na matahiti 1690, 1826, e 1827 atoa.

Te parahi nei te tahi vahine himene o Edith Walker te io'a i te oire ra o Lonedona i Beritani. Ua tarahuhia oia e te tahi sotaiete ia himene, ta moni hebetoma, e teie ta'na taima e aufauhia'tu e ratou ia'na e pae tau-sani tara i te hepetoma hoê.

I teie nei matahiti i mairi a'enei ua oti te mau taata i te hau Amerika i te taiohia. E teie te rahi o te mau taata, oia hoi 91,972,266. Te vai atu ra ia mau taata i na fenua Hawaii, Alaska, Porto Rico e te mau fenua Philippine mau fenua aihu'araau no Amerika aita i oti i te taiohia e te amuihia mai i roto i teie nei taioraa.

I te mahana 13 no Tenuare ua tae mai i Papeete nei te tahi pahi auahi Iapone "Taisei Maru Takio" tira maha. Ua tuu mai taua pahi mai te fenua Iapone i te 1 no Novema. E ere ia te pahi rahi roa, 2,100 tone. E pahi haapii mataro. Hoê hanere e pae ahuru taata to nia ia'na. E 94 taata apî haapii. Ua reva'tura taua pahi ra i te 19 no Tenuare haere tia'tura i te fenua ra o Niu Zilani.

I te 18 no Ditema ua tomo roa i te miti te tahi motu iti i fatata i te fenua Amerika i ropu. Ua tupu taua motu iti o tei parauhia Ilopango e ua iteahia i te matahiti 1880. I mana'ohia teie te rahi o te taata tei pohe roa i reira, oia hoi, 150 e aore ra e tae atu i te 175. Ua aueue-pinepine-hia taua fenua ra mai te ahiahi e tae noa'tu i te hora hoê i te poipoi, ei reira to'na moe-roa-raa'tu e te poheraa o te mau mea ora to nia iho.

Te rave ra te mau taata e rave rahi i te ohipa haaparariraa arahu i raro i te hoê apoo hohonu roa i te fenua ra o Beritani. E inaha hoi, ua tutuihia te matai ino i reira, pohe roa ihora na taata 360. E ati riaria rahi hoi te reira.

Ua haere te hoê taata o William Mogg i te pae fenua apatoerau roa, ei reira ua farerei oia i te mau taata ai'a no taua fenua ra. A tahi te reira to ratou farereiraa i te papaa maori râ hoê noa iho taata ruau no ratou. E ahu iri puaa taehae ana'e ta ratou. Tirara'tu ta ratou mauhaa tamai taparahi mau puaa taehae maori râ te fana, te ohe e te tahi mau tipî veo. E mau fare pape toetoe ana'e ta ratou.

I te avae Ditema i mairi a'enei ua opua te hoê taata e ta'na vahine here ia faaipoipohia raua na nia ia i te tahi pereoo uira, a haere oioi noa'i oia. No reira ua faaite atu raua i te hoê orometua i to raua hinaaro, e ua faatia oia ia haere na nia i taua pereoo a faaipoipo ia raua a tere noa'i taua pereoo ra. Ei reira ua haere ratou tootoru e na ite toopiti atoa i nia i te pereoo. E i muri a'e ua faatere-oioi-hia te pereoo, oia hoi te tere noa ra oia hoê maile i te minute hoê, ei reira ua faaipoipohia raua e te orometua. E i oti ai ua mauruuru no te mea aita ratou i roohia e te ati.

I parauhia te fatu mori arahu o John D. Rockefeller, o tei parahi i te oire ra o Niu Ioka i Amerika, e taata moni rahi i te ao atoa nei, e e taata horoa noa oia. I te matahiti 1889 ua faatia oia i te tahi haapiiraa rahi i parauhia te University a Chicago, i te oire Chicago i Amerika. E mai reira mai e tae noâ'tu i te matahiti 1900, ua horoa oia te moni 24,692,382 tara ei tauturu i taua haapiiraa ra. E i te matahiti 1910 i mairi a'enei ua horoa faahou â oia i te moni 10,000,000 tara i taua haapiiraa. Ia amui-pau-roa-hia te moni i horoahia'tu e a'na i taua haapiiraa i roto i na matahiti 21 teie ia te rahiraa, oia hoi, 34,692,282 tara.

I te 21 no Ditema ua pohe roa na taata toopiti-tui roo faatere pahi reva i Amerika. Tei te oire Los Angels i Tarafonia te poheraa a te taata ra o Arch Hoxey. Ua huru teitei oia i nia i te reva a roohia'i ta'na pahi i te ati, e ua topa taue noa i raro i te fenua nei pohe roa ihora. O oia iho te taata ua faaterehia ta'na pahi reva 11,474 avae i te teitei, e te faatereraraa te reira e hau a'e i te teitei i te mau faatereraraa pahi reva i iteahia na. E o John Moissant te tahi taata faatere pahi reva ua pohe atoa i taua mahana iho â. Te roohia ra oia i te ati a faatere ai ta'na pahi na roto i te reva e ua topa oia na roto atu i te pahi a maua noa'i te reira, e ua mairi oia i raro mai nia roa i te reva e ua û to'na upoo i te fenua nei, fati a'era to'na a'i pohe roa ihora. E i muri iti iho ua topa noa te pahi i te fenua nei i pihaiho ia'na.

Ua parari te pahi "Nuhiva" i te mahana 21 no Tenuare. Tei te fenua ra o Fakarava te vahi i pararihia'i. O te totaiete S. C. O. te fatu no taua pahi ra. I parauhia ua tomo roa i te tao'a e te maa a parari ai oia. Aore e taata i pohe, maori râ te pahi ana'e.

Ua fanau i te oire ra o Galt i Tarafonia te hoê tamarii tamaroa i te 22 no Ditema. E aiû nainai roa ia, teie to'na faito e 8 initi e te afa i te roa. Hoê afa kilo to'na teiaha. E mea maere hoi te reira no te mea na metua na'na na taata huru rahi. E mea itoitoe teie aiû iti e te tupu maitai roa.

Ua parau te tahi fatu urî i te fenua Purutia te ite ra ta'na uri i te re'o papaa, e ua tia ia'na ia parau vaha i na parau e hitu i roto i te re'o Purutia. Ua nâ ô a'era te tahi mau taata e, e ere ia te parau mau. E ua haere atura te tahi orometua haapii tamarii a hiopoa i taua uri ra. E i oti te uri i te hiopoahia e a'na, ua parau mai oia na ô maira, e parau mau taua parau ra, ua tia ia parau papu mai taua uri i na parau e hitu i te re'o Purutia. E te faaroo nei oia i te mau parau e rave rahi i roto i taua re'o ia parau atu ia'na. E uri paari e te maitai hoi.

Ua tupu te peapea rahi roa ino i nia na manuâ Brazil i na avae i mairi a'enei i Amerika Apatoa. Ua orure te mau mataro, e ua taparahi pohe roa ratou te mau raatira. E ua haru ratou na pahi e maha. Teie te hoo no te Sao Paulo i haruhia e ratou, oia hoi 10,000,000 tara. E pahi rahi apî roa, oia hoi 25,000 tone, tei hamanihia i Beritani. Aita te hoê pahi manuâ e hau a'e i teie i te rahi e te puai hoi i te ao atoa nei. E te piti o te pahi oia te Minas Geraes hoê â ia i te rahi e te puai. E na pahi e piti faahou i haruhia e ratou aita e au i teie nei na pahi i te rahie te puai, area râ na pahi maitai atoa. Ua pupuhi te orure hau i te oire. E i muri a'e ua parau atu ratou i te peresideni i roto i te oire, na roto i te parau reva, na ô atura, ia faaorehia ta matou hara taparahi taata i ravehia e matou, e ia faaore-atoa-hia te hamani ino ia matou i nia i te mau pahi, e ia faarahi rii â ta matou taime no te ohipa rahi rohirohi i ravehia e matou, ua tia ia matou ia faaho'i atu teie nei mau pahi i to rima. Te feruri ra te apoora rahi no te hau, tei titauhia mai e te mau orure hau. E i muri a'e ua faatiahia e ratou tei titauhia mai. Teie râ ua reva tua te mau orure hau hou te parau faatia ra no te hau ua tae atu ia ratou.

Toae a Maire, Faaau Parau,

Rue Dumont d'Urville, Orovini, Papeete, Tahiti.

W. A. Seegmiller, Imprimeur,

Rue Bréa et de la rue Dumont d'Urville, Papeete, Tahiti.